

AC 2117.

DISSERTATIO INAUGURALIS
MEDICA

DE

DIFFERENTIIS,
QUAE INTER FEBRES
VASORUM EASQUE NER-
VORUM INTERCEDUNT

QUAM
UT GRADUM DOCTORIS MEDICINAE

IN
UNIVERSITATE CAESAREA LITERA-
RUM DORPATENSI

RITE ADIPISCATUR

CONSENSU ILLISTRIS MEDICORUM ORDINIS

DIE XXX. M. J. H. A.

PUBLICE DEFENDET

AUCTOR

CAROLUS ALEXIUS SCHULTZ;
DORPATENSIS.

exxiii:13

DORP ATI
LITERIS MICHAELIS GERHARDI GRENZII
TYPOGRAPHI ACADEMICI,
MDCCCXI.



Notio febris in universum.

De proxima febris causa sive de natura hujus morborum classis nondum quidquam certi scimus; verum perquam verisimile est, febrium ut omnium ceterorum morborum causam inesse in mixtione et forma materiae organicae. Nam id, quod vim vocamus, est ali- quid, quod ex plurimum phaenomenorum compariatione instituta animo nobis effinximus, ut ex eo phaenomenorum horum rationem expli- cemus; Verum unde haec phaenomena ori- possint, nisi ex aliquo, quod vere est? atque haec est illa materia, quam nunc ratione mix- tione et formae habita observare possumus. Ubi vires mutantur, ibi materies mutata sit, necesse est, ut vires mutari potuerint. Quapropter nullus morbus in theoria cogitari po- test, nisi mixtione et forma materiae mutata;

At qua in re insit haec mutatio mixtionis materiae, unde et quo modo ubique gignatur, hoc raro cum certitudine quadam definire possumus et facile eo usque obscuro velo tectum erit, donec chemia altius se efferens nos docuerit, quae sit mixtio corporis organici vivi. Cujus rei causa inest in eo, quod ne eos quidem mixtionis mutationes, quae fiunt in natura anorganica, quarumque effectus et leges notiores tam nobis sunt, recte metiri huc usque potuimus. — Itaque cum proxima febris causa nos lateat; in descriptione hujus morbi subsistendum est, sive in enumeratione eorum symptomatum, quae ad naturam febris pertinent et propterea in hoc morborum genere, quamcumque formam induerit, necessario inveniuntur. Ne definitionem quidem febris dare possumus, propterea quod nimiam specierum multitudinem ad hoc unum genus referimus; si qua vero definitio totum genus complectitur, ubi omnia exhauriat, in descriptionem abit. Symptomata essentialia, sunt haec: 1) mutata temperies. 2) pulsus abnormis. 3) aucta incitatio systematis vasorum et nervorum. 4) debilitas actionum muscularum spontanearum. 5) secretiones et excretiones pathologice mutatae.

6) decursus periodicus symptomatum essentiale, quae febrem comitantur. Febres etsi multis aliis modis dividii possunt, respectu quoque organorum habito, quae praecipue afficiunt, in plures species distribuuntur: quaevis harum febrium vero triplici modo inveniuntur vel in synoche (ubi aucta perceptio cum perquam aucta reactione conjuncta est) vel in typho (ubi peraucta perceptio cum imminuta reactione invenitur) vel in paralysi (ubi et perceptio et reactio imminuta est.)

Duo systemata primaria in corpore humano sunt sistema vasorum et sistema nervorum et comparatio febrium amborum horum systematum in universum objectum erit hujus dissertationis.

I. *Definitio.*

Febrem vasorum eam intelligimus, quae praecipue in abnormi functione systematis vasorum inest. — **F**ebrem nervosam eam vocamus, ubi ex ceteris symptomatibus essentialibus febris praecipue functiones sensiori ejusque radiorum, nervorum, abnormes sunt.

Quantuscunque arctissimus ille mutuus nexus et mutuus effectus sit, quem systemata vasorum et nervorum inter se exserunt, videmus tamen in ambobus prorsus separatam affectionem locum habere posse. Possidemus multa remedia, quae vehementer sistema nervorum irritant, systemate vasorum non in eadem proportione affecto. Exemplo sit Camphora loco omnium reliquorum, quae afferre possumus. Alia sunt remedia, quae vel exclusis aliis systematibus, vel praecipue tamen in sistema vasorum vim incitativam exserunt; exemplo sit gas oxygenium. Hoc ipsum, quod de stimulis artificiosis praedicavimus, in naturalibus stimulis vitalibus etiam valet. Qui invasis continetur sanguis ut stimulus incitans in parietes eorum operatur; qui sanguis ruptis parietibus vasorum vel ostiis eorum facultate contrahendi privatis in cerebrum effunditur atque hoc attactu suo afficit, quamvis semper calorem vitalem retineat, non tamen ut stimulus excitans in sensorium operatur, sed effectus ejus deprimentes potius sunt, idque sola mechanica pressione; propterea non ut stimulus percipitur.

Redeo ad id, unde digressus sum. Febres tam vasorum quam nervorum characterem habent et Synoches, et Typhi et Paralyseos; ambae praeterea maxime diversis modis tum inter se tum cum aliis febribus complicatae reperiuntur, quod ulterius exponere non hujus est loci. Exemplum Synoches systematis nervorum est mania acuta, Typhi communis febris nervosa simplex, et paralyseos febrosae secundum stadium hydropsis cavorum cerebri. Exemplum Synoches Systematis vasorum est febris inflammatoria proprie sic dicta ut et arteritis et phlebitis; Typhi febris putrida; Paralyseos angina scarlatinæ gangraenosa. Ephemeram pro minori synoches gradu habere possumus, qua propter omnia, quae de hac dicta sunt, de illa quoque intelligi possunt, ratione hujus diversitatis graduum habita.

II. Diagnosiss.

1) Febris vasorum.

A. ubi characterem Synoches habet.

Invenimus hic auctam cordis et systematis arteriosi ut et organorum respirationis functionem. Pulsus ideo frequens est et pro frequentia

perquam magnus; valide pulsat contra digitum adtingentem, tantumque abest ut reprimi possit, ut potius per quamvis pressionem fortiorum major et durior evadat. Quod indicium est non solum magnae arteriarum irritationis, verum etiam magnae energiae et aucti toni parietum earum. Respiratio aliquantis per difficultis est, sed frequens atque aëris exspiratus calidus est. In universum major caloris copia in toto corpore gignitur functione systematis arteriosi aucta, propterea peripheria exterior tensa est, siccaque et calida sed non urens. Ex aucta irritatione systematis vasorum oritur spasmus in ejus ramis exhalantibus per antagonisticam validam reactionem horum ostiorum, unde omnes secretiones et excretiones suppressae sunt. Oculus splendere et ardere solet, os est siccum, lingua rubra et vix tenui muco omnisque coloris experte tecta; sitis magna. Secretio muci ex naso exigua, propterea nullus aut gustus aut olfactus. Urina parce excernitur eaque saturata, rubra urensque. Evacuatio alvi est suppressa, paululum sordium alvi perquam durum excernitur, quoniam vasa quoque lymphatica in intestinis auctam actionem habent ethumida resorbent. Ulcera et fontanellae sicca-

fiunt. Arteriae valide pulsant, praecipue carotides exteriore et arteriae temporales. Facies est turgida et rubra; musculi tenti, cephalalgia acris et pulsans. Nodus formativus auctus est; crux ad coagulationem inclinat in eoque crusta inflammatoria adspicitur; nectamen hoc signum evidens est, quoniam formatio crustae inflammatoriae a pluribus rebus fortuitis pendet. Typus febris inflammatoriae continuitas est cum paucis remissionibus, quae vario tempore in singulis partibus systematis vasorum nunquam in toto sistente sub sensu cadunt.

B. ubi characterem Typhi habet.

Irritatio systematis vasorum tunc aucta est, at reactio imminuta, propterea in omnibus symptomatibus characterem debilitatis sensibilis invenimus. Pulsus est perquam celer sed parvus, debilis et maxime irregularis ut proptermodum in omni horae dordante aliis sit. Nullam cum eo proportionem habet respiratio, quae parva est, difficultis, quamvis cum nullo pectoris dolore vel aliis impedimentis localibus conjuncta, sed comitantur eam suspiria involuntaria. Eadem est contradicatio in phaenomenis respirandi quam in iis, quae functiones

systematis vasorum praebent. Temperies corporis modo aucta est modo imminuta, nonquam normalis. Calor urens quique sub manu medici palpantis ingravescat. Propter parietum vasorum imminutam reactionem in humores, qui iis continentur, facile decompositio-nes in iisdem oriuntur; nec minus imminutus est niſus formativus ut normalem mixtionem eorum non servare possit, unde cohaesio sanguinis semper imminuitur. Sudor est saepe viscidus, putidus, odoris vapidi, acidi et urinosis. Urina est coloris expers sed turbida, cruenta, putida, saniosa. Excretiones alvi sunt decompōsitae, saepe levis diarrhoea locum habet. Cava nasi sunt sicca, patentia, fusca vel nigra. Lingua tecta est fusco et sordido involucro, rarius est humida, saepius sicca, aspera dura et fissa ex spasko asthenico caeterorum vasorum in superficie ejus. Ex aucta irritatione sed imminuta et abnormi reactione systematis arteriosi facile oriuntur congestiones praecipue versus caput, unde sensus aliquis gravitatis et pressionis in eodem, praesertim in occidente cum obscuro conscientiae sensu et vertigine exsistit. Albuginea est rubra vel flava, sordida, quod decompositions prodit,

quae in succis organicis factae sunt. Color corporis est sordidus vel pallens, in nonnullis locis livide per epidermidem pellucens, quod signum esse mixtionis abnormis sanguinis videtur. Sanguis itaque extra corpus non celeriter coagulatur aquosus est atque in superficie ejus nonnunquam formatur crusta mollis, mucosa versicolor.

C. ubi characterem paralyseos habet-

Torpor in omnibus functionibus systematis vasorum generalis est character hujus febrium generis. Pulsus est perquam tardus, debilis et parvus, quique facile reprimi possit nec semper statim inveniatur, nonnunquam prorsus est intermittens. Similiter respiratio est debilis, tarda, inaequalis, nonnunquam suspirans, aēr exhalatus est frigidus, temperies externa imminuta. Sudores frigidi et viscidii in corpore erumpunt atque aegrotus propter summam debilitatem facultate privatus est sponte se movendi. Excretiones quoque alvi, urinæ et sputae non amplius a voluntate aegroti pendunt sed urina et sordes alvi invito et plerumque inscio aegroto excernuntur; Decompositae quoque et variis modis mutatae esse solent, praecipue aquosae, mucosae, putidæ et semper maximopere colliquativae. Sanguis

maxima penuria materiae fibrosae et lymphae coagulabilis laborat. In universum omnes humores charactere legitimae elaborationis animalis destituti sunt. Color corporis pallidior etiam est, luridior, et lividior quam in typho. Meteorismus in majori gradu adest, integumenta abdominis tenta fiunt et flavoviridia, petechiae et vibices fuscorubrae, coeruleae et magne, sub quibus epidermis facile deteritur. Intuitus est stupidus et stolidus, oculus torpens, pulvere quasi tectus, splendoris expers, fractus. Cornea et albuginea mucosae sunt atque plerumque ptosis adest ambarum palpebrarum superiorum.

2) Febris nervosae.

In hoc febrium genere symptomata primaria, quae characterem ejus constituunt, a functionibus hujus systematis repetenda sunt, praecipue ab affectionibus sensorii coenaesthesiaeos et sensuum externorum.

A. ubi characterem Synoches habet.

Systema nervorum tunc insignitum est charactere exaltatae excitationis cum aucta reactio-
ne. Aegrotus perquam vividus est, multum loquitur et omnes ejus actiones feritatis signum

habent. Deliria sunt frequentia sed cum vi et magna musculorum fortitudine se exserunt (deliria furiosa). In his ipsis deliriis magna vis phantasiae cernitur quae semper ejusdem est generis. Tenax est imaginum, quas semel animo concepit, inclinat ad effrenatam epicefere fingendi licentiam atque affectus ejus ebulliunt quasi et ultra communem modum perdurant. Nulla quies est aegroto, exsilit e lecto et furiit. Sensus internus praevalet, unde receptivitas impressionum a rebus externis acceptaruū maximopere imminuta est, imo prorsus deleta. Res externae alienam formam ipsi induunt, saepe monstrosam, quoniam phantasia ejus ex se ipsa imagines creans vividior est, quam ut in rerum ut sunt imaginibus ser-
viliter referendis adquiescat. Phantasmata haec characterem augustiorem, vividiorem et fortioriem habere solent. Colores rerum fulgentes et lucidiores apparent. Videtur sibi sonos fortes et acutos audiisse quales ab explosis bombardis et tintinabulo campanarum proficiuntur. Audax est, efferus, fervet furiisque, et omnia destruit. Somnus est inquietus et vividis somniis interruptus, quae somnia et ipsa ferocitatem et audaciam phantasiae procreaticis

arguunt. Accedunt acres et spasmosi motus musculorum.

B. ubi formam typhi habet.

Omnia phaenomena, quae a systemate nervorum pendent, monstrant, nunc auctam recepitatem impressionum extrinsicus acceptarum, latius sumpta hujus vocabuli potestate, locum habere, una cum perquam imminuta intensitate effectuum, qui per has impressiones a centro interno (cerebro et medulla spinali) ad peripheriam perferuntur. Inde oritur permanens affectio sensorii, quae non ultra hoc evagatur. Inde asthenica et quasi paralytica conditio et nervorum et vasorum cutaneorum, quam facile animadvertis in turgore imminuto et functionibus cutis prorsus sublatis atque peripherica exhalatione prorsus deficiente, nutritioneque et excretione aut prorsus aut maximam saltem partem sublata. Eadem conditionem animadvertis in superficiebus internis et in harum ostiis vasorum, unde urina pallida, siccitas superficierum internarum etc. oriuntur. Vires statim ab initio valde imminutae reperiuntur, frequentes dipothymiae vel in minima virium intensione, ut ubi aegrotus periculum fecerit lecti relinquendi vel adeo in eo se convertendi.

Torpor animi, vertigo cum sensu debilitatis. Leves animi aberrations. Omnes aegroti phantasiae hominis sunt animum despondentis et tristis. Haec desponsio animi et tristies aperte oriuntur ex eo, quod animus aegroti per coenaesthesia obscurum sensum habet gravissimae conditionis vitalitis debilitatae, scilicet influxus systematis sensibilis in sistema miscens, a quo posteriori integritas omnium organorum ut et integritas functionum eorum pendet. Mortem vicinam certamque putat timetque. Hinc explicari potest sensus ille divinationis, quam postea effectus ratum habuit, ut nonnulli mortem sibi imminentem in certum tempus praedicerent, quod pluribus aenigma psychologicum, quod non solvi posset, visum est. Lineamenta oris timorem metum et inquietudinem referunt. Inveniuntur praeterea circum supercilia et angulos nasi lineamenta melanocholica, quae prope absunt a lineamentis faltitatis atque apathiae. Sonus et sermo vagi sunt, debiles, tremuli, lingua tremula. Convulsiones locum habent in singulis muscularis vel in extremitatibus, sic et chorea St. Viti et tota series ceterorum spasmorum tum clonicorum tum mixtorum. Contra quoque

invenitur summa apathia etiam efficacissimis stimulis adhibitis, unde typhus nervosus proxime accedit ad conditionem paralyticam systematis nervorum. Aegrotus vel prorsus non dormit vel, ubi dormierit, se non dormisse postea contendit. Ex sensibus externis visus praecipue, auditus et olfactus exaltati sunt, atque imagines phantasiae morbosae, quae in delirio febrili ipsi objiciuntur, ab objectis horum trium sensuum externorum petiae esse solent. Sed impressiones, quae per sensus fiunt, characterem referunt roboris imminuti, vagaeque sunt nec rectam de iis notionem aegrotus animo concipere potest. Quin imagines et notiones internas, quas ab uno sensuum objecto accepit, confundit cum aliis, quas aliud objectum ipsi suppeditavit, facillimeque suam ipsius personam cum aliena permutat e. g. aegrotus videtur sibi sentire, alium hominem prope se jacere, qui de eadem conditione morbosa queratur, quam ipse sentit. In universum multum contradictionis atque logicae inaequalitatis invenitur inter id, quod vere sentit et id quod sentire sibi tantummodo videatur. Appetit vehementer vel cibos certos facile concoquendos (pica), vel prorsus non concoquentos

coquendos (malacia). Laborat saepe idiosyncrasibus miris, quae omnia indicia sunt sublatae harmoniae in functionibus diversarum partium systematis nervorum.

C. ubi characterem Paralyseos habet.

Torpor in omnibus functionibus facultatis sentiendi primarius hic est character. Nullam fere communionem cum rebus extra se positis habet atque sola incitamenta vitalia interna et necessaria in varias systematis nervorum partes parce operantur. Continuo sopore aegrotus oppressus jacet, ex quo haud facile expurgiscitur (carus) vel, etsi ex eo excitatus fuerit, somnolentus tamen manet, stupide et confuse intuens (lethargus), vel omnium fere sensuum cogitationumque expers brutus quasi jacet atque quidvis de se agi patitur et vel prorsus nil videt auditve vel visus auditusque perquam debiles sunt. Cornea muco quasi inducta est aut pulverulentam faciem habet; vasa albagineae paululum turgida pelluent colore flavorubro. Similiter sensus externus valde debilitatus est ut efficacissimis incitamentis opus sit, ubi ea percipere velit. Tempores corporis perquam imminuta est, cutis flaccida omnibusque functionibus privata et tan-

genti marmoris instar frigida. Paralysis oesophagi, intestini recti et plurimorum ceterorum organorum et secernentium et excernentium. Perfacile quoque in ostiis externis vasorum paralyses oriuntur, unde diapedesis sanguinis, echymoses, magnae petechiae. Nihil fere est quod aegrotus desideret, plerumque sui non conscious; validissimis impressionibus opus est ut notiones de iis concipiatur. Auditus tamen ex omnibus sensibus externis diutissime facultate recipiendi gaudet. Accedit ptosis et paralysis omnium muscularum.

III. Aetiologya.

1) Febris vasorum.

Cum verisimillimum sit, proximam causam omnium febrium in vitiis mixtionis et formae organorum febricantium inesse, eadem causa hic quoque nobis statuenda est; sed quanam in re haec mutatio mixtionis insit, non certo scimus. Quid, si in proportione quoad quantitatem vitiosa oxygenii cum ceteris partibus constituentibus insit? quoniam oxygenium, quod elementis adnumerari solet, validissimum et maxime propagatum incitamentum systematis. praecipue arteriarum est

idemque maxime nisum formativum excitat, cui nisui sistema vasorum organi instar servit. Quo posito, in febri vasorum, quae charactere Synoches praedita est, oxygenium praevalebit, propterea quod in hac febri praeter incitatem auctam maximum nisus formativi influxum animadvertisimus. Minus hoc locum habebit in typho; at in paralysi proportio oxygenii nimis imminuta erit, sed contra hydrogenium perquam verisimiliter praevalebit, quod decompositiones organicae, quae in quavis conditione paralytica ut in gangraena, locum habent, probare videntur.

Similiter proxima causa febris vasorum in vitiis formae inest; in Synoche aucta est cohaesio membranarum vasorum, quae conjuncta cum redundantia oxygenii communem causam abnormis condensationis vel abnormiter auctae cohaesionis humorum continet. In typho et in paralysi cohaesio partium solidarum immunita est, humoresque resoluti sunt. Ad summum gradum utrumque in paralysi pervenit, quae quoque proprie nihil aliud est nisi major typhi gradus.

Ex vitiosa hac et mixtione et forma in febri vasorum proxime sequi animadvertisimus

mutatam virium vitalium conditionem, mutatam morbosamque perceptionis et reactionis proportionem, unde character Synoches, typhi et paralyseos constituitur. Ex eadem causa oriuntur colliquativae atque abnormiter mixtae excretiones atque prorsus imminuta vegetatio, quae ad phaenomena specierum febris vasorum pertinent.

Causae praedisponentes: a) ad febrim vasorum Synoches charactere insignitam, sunt: Serior aetas juvenilis atque incipiens virilis, sanguis crassior cum redundantia materiae fibrosae, fibra nimis tenta et valide reagens, auctus tonus partium solidarum, habitatio in montibus, assiduus esus carnium, genus a parentibus validis ductum, temperamentum sanguinicum et sanguinico-cholericum, nimia abstinentia a venere. — b) ad febrem typhosam: sexus foemininus, aetas puerilis et senilis, sanguis dilutus, decompositus et nimia multitudine materiarum excitantium praeditus, magna fibrae excitabilitas, genus a parentibus invalidis ductum, clima humide calidum etc. c) ad febrim paralyticam: ultima senectus, fibra rigida nec satis reagens, laxitas fibrae, humores aquosi et excitandi facultate privati,

pauperies, habitatio in cellis subterraneis iisque humidis, aër oxygenio privatus etc.

Causae occasioneles. a) Synoches: frigus siccum, aër oxygenio abundans, ventus a septentrione et inter septentrionem et orientem flans, exercitatio corporis intenta et fortius musculos adhibens, copia sanguinis celeriter aucta sumtis alimentis nutrientibus et animalibus, amputatio membrorum majorum, refrigeratio praesertim praecedente sudore, repente suppressae excretiones vel naturales vel artificiales quibus quis adsuetus erat. Calor siccus ingravescens, ardor solis, aër vernalis ex oxygenio per solutam nivem genito. b) typhi atque majori in gradu paralyseos. Corruptela cuiuscunque organismi partis atque resorptio harum materiarum corruptarum, unde humores decomponuntur; defectus alimentorum validorum animalium, et e contrario usus alimentorum vapidorum corruptorumque, aëris temperies humide-frigida et humide-calida, habitatio sanitati noxia, plura contagia et venena, aër corruptus atque oxygenio privatus, nimiae evacuationes praesertim sanguinis, oxyda mercurialia et alcalia, quae cohaesionem sanguinis tollunt, morbi debilitantes, qui praे-

cedebant et in reconvalsentia negligebantur, abusus venenorū stupefacentiū, praesertim laurocerasi.

2) Febris nervosae.

Proxima ejus causa inest in mixtione vitiōsa, defectu vel abundantia principii incitativi et in vitiōso gradu cohaesiōnis nervorum id continentium et propagantium, praecipue in vitiōsa nutritione nervorum.

Hoc vero principium incitatīvum ammoniū est, quod in nervis ipsis ope vasorum huic consilio propriorum partimque se in eorum vaginas exsērentium, exhalationē sēcernit. Jam vero, etsi haec Balkii, Professoris etc. in hac universitate, theoria operationis nervorum nondum mathematicam certitudinem adepta sit, tamen multiplex experientia argūmenta præbet verisimilitudinis, quae haud procul abest a certitudine. Phænomenon illud, ad quod Reilius primus præcipue nos attendere jussit, maniacos propriū odorem exhalare, quem ammoniacum esse pateat; præterea experientiae illae, quae Balkio V. D. se obtulerunt, tum aquam illam, quae in cava cerebri in hydrope eorum effundatur, contīnere copiam ammonii liberi, tum serosum

illum liquorem, qui ope vesicatoriorum in Cotunni ischiade nervosa atque in aliis puris nervorum morbis secernit, semper ammonium continere; tandem utilitas præcipua remediōrum ammonium continentium in adynamis nervorum ut salis Cornu Cervi in lipothymia spiritus C. C. in paralysi imperfecta et debilitate onanitica; haec omnia ut pauca tantum afferam ex pluribus, quae afferri possent, argūmento sunt evidentissimo ipsam hanc secretiōnem ammonii liberi conditionem esse verarum functionum nervorum, unde conclusio fit, quae verisimilitudinem etiam superat, ammonium esse principium primarium excitationis nervorum. Praeterea Balkius in omnibus morbis characterem hyperstheniae nervosae referentibus, urinam excretam, postquam aliquamdiu calori exposita erat atque processus putredinis in ea inceperat, multo minus ammonice olentem invenit, multoque difficilius huic processui putredinis per quem ammonium oriuntur, subjectum, quam urinam sanorum. Contraria ratio erat in multis nervorum morbis asthenicis.

Abundantia itaque principii incitativi nervorum et aucta cohaesio vaginalium nervorum

proximam causam Synoches nervosae; defectus vero hujus principii cum imminuta cohaesione causam nervosi typhi et paralyseos continent.

Vitiosa conditio subtilissimi principii excitativi et vitiosa nutritio nervorum praedisponunt ad hanc morborum classem, item vel aucta vel imminuta cohaesio vaginalium nervorum, quarum illa praedisponit ad morbos nervosos cum imminuta sensibilitate et aucta reactione, haec vero ad febres nervosas, in quibus sensibilitas praeponderat, ubi charactere astheniae directae insignitae sunt. Praedisponunt praeterea periodi evolutionis, tempus dentitionis, pubertatis, in universum aetas juvenilis et sexus foemininus.

Causae occasioales febris nervosae a) Synoches characterem habentis sunt; omnes eae potentiae nocentes vel externae vel internae, quae nimis principium incitativum cumulant, quaeque cohaesionem abnormiter augent. Huc referuntur: aër nimis materiai electricis refertus impertit nervos nimia electricitate atque natura hujus materiae electricae eadem fere esse videtur atque principium illud incitativum. Odor fulminis extincti monstrare videtur inesse ei hydrogenium et

azotum, ex quibus ut notum est ammonium oritur; praeterea frequentior esus alimentorum animalium praesertim corruptorum; impertunt enim corpus nimio azoto et ammonio imperfecte formato, quorum illud pars constituens est principii nervorum. Cibi stimulantes, potus spirituosi sensibilitatem nervorum augent. Pertinent huc quoque abusus medicamentorum, quae sistema nervorum praecipue afficiunt multumque ammonii continent, praeterea commotiones animi et affectus, praecipue si excitanter operantur, sive repentinae, fortiores et durantes sunt. b) causae occasioales typhi et majori in gradu paralyseos sunt omnes eae potentiae noxiae, quae principium incitativum nervorum consumunt aut cohaesionem nervorum imminuunt. Aër humide calidus electricitatem subducit, aër insuper humidus, praecipue humide frigidus egregius est conductor caloris atque tantummodo, ubi calor generatus fuerit, processus nisus formativi in corpore organico locum habere possunt; nimia copia alimentorum laxitatem gignentium, multae potionis tepidae et aquosae nervos cohaesione privant iisque, ut admodum verisimile est, cum boni sint coductores, materias haec organa in-

citantes subducunt. Aliae res, quia celeriter principium nervosum consumunt, periculosissimos nervorum morbos producere videntur, ut venena stupefacientia, genera gasum irrespirabilem, nimia venus, quae eodem modo ut nimia intentio animi exhaustionem principii iniciativi nervorum gignit. Praecipuum praeterea influxum in febres nervosas typhosas gignendas affectus deprimentes et commotiones animi ut moeror, timor, terror etc. exserunt.

IV. Décursus, crises et exitus.

i) Febris vasorum.

A. ubi Synoches characterem habet.

Raro prodromi hic observantur, nisi quod nonnunquam aliquot diebus antea magna inquietus, dolor capitis, rubor faciei et oculorum et pulsus aliquantis per excitatus inveniuntur. Balkius saepius auctam secundam coenalesthesin fallentem, praecipuam vivacitatem et sensum fortitudinis muscularum auctae ut prodromos hujus febris observavit. Multo rarius erat, quod aegroti plumbeam quasi gravitatem in corpore sentirent, conjunctam tamen illam vel cum agrypnia vel cum somniis vividis.

Tum advenit febris ipsa, plerumque subita cum gravissimo frigore concutiente, post quod sequitur calor proportionalis, non ardens tamen sed e contrario tactui manus deminuens, qui per totum fere morbi decursum aequalis remanet, paululum tantum imminuitur, quemadmodum in universum febris haec typum apparentem continuum conservat. Causas hujus continuitatis apparentis Reilius, perspicacissimis nostrae aetatis medicis adnumerandis, in classico de febribus opere explicavit. Quotidie symptomata graviora videntur ad quartum plerumque diem ita ut septimo crisis sequatur. Rarius durant usque ad septimum, nonum vel undecimum diem, tum crisis sequi solet die decimo quarto. Inter somnum satis quietum et recreantem interque pulsum mollem, tardum, undulantem, levis maior cutis erumpit, quem nonnunquam praecedit haemorrhagia critica nasi, haemorrhoidum, mensium. Serius urina hypostatica accedit, quae antea fuerat coloris rubri flagrantis, nunc clarior fit atque in medio albam nubeculam format, quae sensim versus fundum vasis vergit atque in eo parvum acervum arenæ subtilis et albae, pyramidis formam referentem, relinquit. Absces-

sus quoque cutis inflammatorii, erysipeles in peripheria et in superficiebus internis crises sunt hujus febris. Sic Balkius ante paucas hebdomades pneumoniam hypersthenicum characterem sine dubio habentem per criticam metastasin in fortē anginam oesophagi abire vidit. Propter auctum nisum formativum inclinationemque sanguinis ad coagulationem facile haec febris in inflammationem universalem vasorum sanguinis vel in inflammationes topicas abit, quae rursus tum in dissolutionem, indurationem, suppurationem aut generationem membranarum haud naturalium mutantur. Nisi vero ars remedia debilitantia cito et convenienter adhibeat, transitus quoque nonnunquam fit in conditionem paralyticam ut in gangrenam.

B. ubi typhi characterem habet.

Animadvertisimus hic aliquamdiu saepe aliquot diebus antea ut prodromos sensum aliquem valetudinis adversae haud definiendum, pigritiem, fastidium, gravitatem membrorum, defectum appetitus, plenitudinem in praecordiis, somnum inquietum nec recreantem, quamvis semper inclinatio eo adsit, secretiones et excretiones abnormes. Febris incipit a levi fri-

goris sensu, quem per vices calor sequitur; saepe vero frigus etiam concutiens est, alte penetrans, accedens ad marmoris frigus eoque diversum a simili frigore, quod in febri vasorum synochosa animadvertere nonnunquam licet, quod multo brevius est quam hoc, quoniam vis reagens vasorum statim ab initio hic debilitata est et quod ex sensu aegroti ipsius in intimam usque ossium medullam penetrare videtur. Frigus calorque temporibus incertis redeunt nec regularem typum conservant, plerumque tamen versus vesperem conditio aegroti pejor fit. Vires celeriter decrescent atque omnia ea symptomata quae in diagnosi attulimus, ex ordine adveniunt. Raro crisis ante diem decimum quartum, saepe die demum vicesimo septimo reperitur. Aetas anni, constitutio, complicatio atque sua cujusque corporis conditio tempus hoc definiunt. Qui morbus, si non statim a medico agnitus fuerit vel culpa aegroti accesserit, saepe in febrem hecicam et chronicam abit; Perspicuae crises in hac febri rarae sunt; excretiones, quae sensibus perspici possunt, facile nimis impetuosae fiunt propter asthenicam conditionem ostiorum vasorum secernentium et excernentium et id,

quod ita excernitur ut in sensus cadat, etiam in stadio decrementi morbi characterem habet decompositionis chemicae. Peiora symptoma sensim evanescunt, vires augentur sed diu est, donec aegroti vires recipient et in periodo convalescentiae magna inclinatio ad recidiva remanet. Nonnunquam per metastasis febris haec transit in tumorem inflammatorum parotidum vel in furunculos inflammatorios, qui crescentibus viribus vitalibus passim in superficie erumpunt, valde illos quidem dolentes nec tamen magnopere inflammatos, nisi ars vigilans salubriter adhibita methodo topica excitativa iis subveniat. Inflammationes asthenicae lentae singulorum organorum saepe ex hac febri vasorum oriuntur.

C. ubi characterem paralyseos habet.

Haec plerumque febrem typhosam sequitur atque vel otius vel serius oritur secundum diversum gradum et vehementiam ejus, nonnunquam jam tertio, septimo, ad summum nono die, imo in febribus perquam contagiosis post viginti quatuor horas. Plerumque transit in gangraenam, quam praecedere solet formicatio, calor, dolor, torpedo partium affectarum. Scirrhosa quoque induratio inde oriri potest.

2) Febris nervosae.

A. ubi characterem synoches habet.

Plerumque hic causae validae celeriterque operantes vim subitam exserunt, nihilominus tamen prodromi nonnunquam praecedunt, qui omnes magis minusve characterem auctae mobilitatis systematis nervorum et sensorii, praecipue vero vel minorem vel majorem exaltationem organorum sensuum possident. Huc pertinet, quod aegrotus repente sine causa exardescit vel quod ipse sibi negotia facessit, quodque in actionibus non sibi constat. Loquax est, facile afficitur lumine, sono, mutata temperie, praesertim calore. Observantur agrypnia, sensus morbi haud definiendus, nec eo secius tamen perquam vividus, perturbationes spasmoticae in secretionibus etc. Tandem febris advenit conjuncta cum perfecto furore et mania. Propter magnum in sistema nervorum tumultum non longum tempus durare potest sed brevi decurrit forma typi apparenter continui assumta. Vere critica eruptio est convulsionum, quoniam per eas principium incitativum immodice accumulatum atque electricitas versus peripheriam derivatur atque ex corpore emovetur. Criticas vero

esse has convulsiones inde appetat, quod die critico evenire solent, quodque nulla gravior debilitas, quae ultra unam aut duas horas duret, in functionibus systematis nervorum sensorii que eorum centri, remaneat. Contrarium vero ubi locum habuerit, animadvertisimus destructionem cerebri et systematis nervorum, indurations et callositates singularium medullarum cerebri partium oriri, unde permanens mania dementia et perturbatio singularium animi functionum subsequuntur. Potest vero etiam fieri ut per commotiones tumultuarias principium nervorum consumatur et synocha in typhum mutetur.

B. ubi characterem typhi habet.

Hic diu jam nonnunquam tribus aut quatuor hebdomadibus antea prodromi varii generis praecedere solent, qui praecipue ex dissensione systematis nervorum conditione originem repetunt atque perspicue semper characterem astheniae facultatis sentiendi referunt, quamvis aegrotus haud decumbat. Somnus inquietus saepaque somniis interruptus, ingenium mutabile, inclinatio ad melancholiā, ad flendum, timiditas quaedam et anxietas, praeagrum conditionis morbosae gravidioris. Jam ipsa

febris

febris venit cum gravi frigore, sequenti acri calore, ita ut nec frigus universale nec calor universalis sed per partes tantum opposita haec temperies inveniatur, atque saepe frigus externum cum calore interno typhosam hanc nervorum febrem indicet. Statim ab initio agrypnia intervenit perque totum morbi decursum ut symptoma characteristicum remanet; quod si locum habet, typhus nervosus acute decurrit atque proprius ad synothen nervosam accedit, vel ubi magis imbecillitas, apathia atque inclinatio ad lethargum observatur, ita tamen ut aegroti per somnum apparentem nullo modo recreentur, typhus nervosus magis accedit ad naturam paralyseos. Accedunt mox deliria placida et mussitantia et die septimo vel nono plerumque convulsiones. Perspicuae crises non observantur, sed spasmus cutaneus remittit et omnia symptomata inter longum quietumque somnum, ex quo aegrotus prorsus sui conscious expergiscitur, diminuntur. Durante hoc somno observantur sudores serose olentes et aciduli vel eruptiones febris miliaris et aphtae, vel salivatio, post quae modo ocius, modo tardius felix eventus exspectari potest, sed in reconvalescentia diu magna

debilitas et incitabilitas, debilitas memoriae et judicii remanet. Ubi vero mōrbus pejus de-
currit, mōrē nonō plerumque die accidere so-
let idque per paralysin systematis nervorum.

C. ubi paralyseos characterem habet.

Haec ex febri nervosa typhosa oritur et
gradu tantum ab ea diversa est.

V. Prognosis.

1) Febris vasorum.

A. ubi synoches characterem habet.

Haec pendet ex aetate et constitutione
aegroti et ex vehementia morbi. In bona et
robusta constitutione, in media aetate et ubi
causae facile animadverti et superari possunt,
fausta est prognosis; funesta vero est, ubi gra-
dus morbi vehementior est mōrbusque ultra
solitum tempus durat ubique crises non ex or-
dine interveniunt; per se non facile necat sed
tantummodo ubi abiit in typhum, suppuratio-
nem, gangraenam, indurationem. Plerumque
tamen diagnosis perspicua est causaeque facile
agnosci et superari possunt, unde semper fere
bonus exitus sperandus est, nisi complicatio
infelix locum habeat, vel aut a medico aut ab

aegroto vitia majora commissa fuerint. Pulsus
qui die critico mollior et undulantior fit, cutis
quae mollior et humidior fit atque his de cau-
sis perspicue imminuta perturbatio organi praecipue
affecti, ex quo si excretorium est, coctae
excretiones excernuntur, optimas quasque et
pulcherrimas spes praebent.

B. ubi characterem typhi habet.

Tum decursus morbi multo complicatior
est, agitio difficilior et remotio causarum
saepe impossibilis, propterea in universum
prognosis funesta. Bonus tamen exitus exspec-
tari potest ubi vires non nimis cito decre-
scunt, cutis non nimis functionibus privata est,
exhalatio normalis vel normali proxima manet,
ubi constitutio antea bona erat, nec character
epidemiae praecipuam aliquam malignitatem
prodit, nec in organis miscentibus vitia orga-
nica insunt, ubique phaenomena regulam se-
quentur. Funestam prognosin praebent: me-
teorismus, convulsiones, excretiones decom-
positae atque immaniter colliquativae, magnus
systematis vasorum torpor, constitutio debilis,
aetas puerilis et senilis, sexus foemininus.

C. ubi characterem paralyseos habet.

Cum hic receptivitas et reactio unius ex grā-

vissimis in organismo systematibus, systematis nisus formativi, suppressa sit, exitus semper fere funestus est, nec nisi perraro tantum, quod pendet ab aetate, constitutione aegroti et a gradu temporeque morbi, sanatio exspectari potest.

2) **Febris nervosae.**

A. ubi characterem synoches habet.

Deliriis hic non frequentibus et lucidis intervallis nonnunquam intervenientibus, morbus incipiens tantum est atque sanatio plerumque sperari potest: idque eo magis, si neque in contagio aliquo causa insit nec prodromi perspicui inclinationem lente progredientem et altius sitam ad hanc morborum formam prodant. Periodus tamen reconventiae longior et inclinatio ad recidiva aut ad transitum in morbos nervorum perquam asthenicos major remanet.

B. ubi characterem typhi habet.

Nisi vires statim ab initio celerrime diminuntur, nisi agrypnia vel lethargus non interrupsus adest, nisi aegrotus animum despondet et judicium amittit, nisi epidemia mortalis regnat, nisi aegrotus aut infans aut senex est

aut praecedentibus affectibus deprimentibus nimis debilitatus; prognosis non prorsus infausta est. Funesta vero, ubi mature delirium mussitans intervenit, in quo oculus mortuus quasi et vitreus videtur; funesta sunt perceptio impressionum per sensus perquam manca, lethargus altus, spasmi continui, lipothymiae continuae et vires valde exhaustae. Mali ominis sunt excretiones involuntariae omnis generis, cutis prorsus functionibus privata, quae per optima incitamenta nullo modo restitui possunt, stranguria continua, conditio paralytica muscularum singulorum, magna apathia adversus efficacissima incitamenta artificialia et adversus validissima sensuum incitamenta. Apathia absoluta adversus omnes res, quibus ante praecipue delectatus erat, ubique imminuta temperies conjuncta cum magna superficie decoloratione, perquam imminutus turgor vitalis; quodsi aegrotus, ubi symptomata infausta jam adsunt, certam sibi imminere mortem, praedicit, haec plerumque timenda est.

C. ubi characterem paralyseos habet.

Quae cum ex typho oriatur, semper mali est ominis.

T H E S E S.

- I. Non dantur morbi primitus absolute universales.
 - II. Causa proxima hypochondriae et hysteriae una eademque est.
 - III. Variolae sic dictae humanae erunt extinctae, dum modo insitione variolarum vaccinarum uti velint, qui reipublicae imperant; haec autem artis peritis tantum concedatur.
 - IV. Hydrargyrum muriaticum, ubi mercurialia necessaria sunt, semper fere sufficit ad usum internum in curatione morborum venereorum.
 - V. Cranii perforatio non omnino est negligenda in arte obstetricia.
 - VI. Omnes pelvimetres, praeter eum a Baudelocque (compas d'épaisseur) inventum, praeterque manum, superflui sunt.